



明神宗實錄

卷二四八至二九一  
萬曆二十年五月至  
二十三年十一月

明神宗顯皇帝實錄卷之二百四十八

萬曆二十年五月庚申朔禮部言十五夜月食該監推算差一  
日宜宥奉旨救護改正行監官李欽等各罰俸二月○壬戌進  
士熊應占乞旌庶祖母李氏孀節奉旨表揚重典乞非例着  
禮部通行各撫按官覈實奏聞無濫○陞四川都司楊威為湖  
廣分守鎮草恭將○巡撫南贛右僉都御史王敬民疏辯御史  
李時華所論通賄選司及攻排李植江東之事乞放歸田里史  
部言其素行清謹未宜去命仍供職不允辭○原任御史陳鼎  
復補河南道鄧鍊復補福建道原任左叅政徐三畏復補陝西  
分巡西寧道原任副使鄭鑑之起補江西副使原任叅議楊楫  
起補陝西固原兵備原任按察使徐汝陽復補湖廣按察使○  
兵部言經畧尚書鄭維沂領馬價四十萬經閱視科臣李汝華

及部道各官查報鎔鍊不與則無重利啗虜東歸之事明甚卜  
酋被劄奔逃火真渡河遠避虜王八九萬騎出邊秋毫無犯今  
邊諭執獻史首操縱在我謂非維有成算不可即聞臣亦謂甘  
肅洮虜漸稀軍民業業矣惟老成威望虜所素服多事之日奈  
何久後林麓灰邊臣任事心乎 上曰鄭維既非啗虜且有安  
邊經畧功着過缺起用○甲子以瑞陽令節賜輔臣上尊珍饌  
○戶部題軍需半稽鹽餉國初引有定數納有常期今寧辛囑  
亂徵兵誅討費餉不貲議添開鹽引量減價值一年及將新開  
事例併移該鎮投納職級照議本色輸運以備芻粟即計日廓  
清亦可資經營之費也從之○閏敘延綏甘肅固原三鎮文武  
官八事修舉功賞仁元陞右副都御史石橫房守士楊特寧張  
綱各陞俸一級睿光祖加副總兵李紹祖陞叅將李杜復副使

職張思忠徐三畏王濂以原官起用仍與朱正色張臣等各奏  
銀帶有差○丙寅 孝宗敬皇帝忌辰遣官祭 泰陵○詔發  
庫貯濟邊銀十萬兩給補甘肅鎮經畧借支及備召軍之用從  
兵部覆議撫臣葉夢熊奏也○丁卯大學士今給假者親王錫  
爵四懇收回召命以終一日之養 上曰卿疏終養屢旨慰留  
原為邊鄙未寧特資匡濟今叛賊勾虜披猖柰何坐視且聞卿  
母已痊何不為朕一出姑侍事平歸養乎行人何崇業着敦促  
上道以慰眷懷○總督尚書魏學曾奏官兵大戰賊敗入城勇  
丁高蓋等三名棄勝撲入殺賊頗多後兵不繼竟死于賊乞先  
行恤錄以勸來者及原任甘肅遊擊徐龍雖經聞臣論劾提問  
訪其在任挫搢力克夷使事甚偉且咸稱其為驍勇才又如見  
監李材雲南之事誠未悉顛末但素有謀畧曾經備倭緩急安

危之秋苟可攀邊陲而慰宵旰固當破格用之耳兵部覆請奉  
旨高蓋等奮勇殺身可憫先給祭以慰忠魂仍各賞優恤銀一  
百兩贈蔭作速議奏徐龍着赴軍前戴罪殺賊○命劉鎮義院  
口等十五閩提調俱改守備職銜管事以重撫夷要衝○己己  
以虜酋不他失禮那木兒台吉擒逆效順陞職示優仍賜勅文  
各一道○朝鮮國王咨稱倭船數百直犯釜山焚燒房屋勢甚  
猖獗兵部以聞詔遼東山東沿海省直督撫道鎮等官嚴加整  
練防禦無致疎虞○辛未 仁宗昭皇帝忌辰遣侯鄭惟忠祭  
獻陵○禮部題原舉人王兆河等七名列部已齊請于朝堂  
覆試以服人心從之○壬申夏至祭 地于 方澤遣公徐文  
壁恭代○大學士趙志昂等言應天等府起送本年選貢生員  
一百二十餘名者直歲貢生員一千二百有奇謹同掌翰林院

爭感訥考試分別上卷中卷進呈御覽報聞○監軍御史梅國  
楨陳六議一重急公師克在和事偵于忌今討逆諸臣皆負時  
望不患謀勇不足患不相為使宜令總督等官分派諸將務釋  
嫌疑首尾應而犄角資有分甲乙逆遯者叅治一鼓忠義爵祿  
待有功朝廷勵世之典肅如薰全孤城射死逆賊及各軍雖經  
陞賞仍查城內居民并加優恤可也一散虜黨督臣魏學曾蕭  
大亨宜宣諭國恩令無助逆順義王新復市賞尤當自效務分  
等第慈以賞格其甘心助逆者嚴勅之一專責成寧夏用兵虜  
乘間思逞者不少各鎮文武官宜嚴有守勿得疎虞一豫儲峙  
千里運糧兵家所忌今關外絕無芻粟宿飽謂何宜相要地委  
官駐劄嚴運務足軍需一禁妄殺除臨陣斬俘以首級報功餘  
聽撫按確審破賊之後尤不許妄殺一人違者梟示兵部如奏

覆請奉旨着實行○癸酉大學士趙志臯等題 聖諭詢史首  
是虜王擒獻何以并敘文武各官照得史首以降表背恩隻犯  
邊塞實播力克兄弟安免之親也力克東歸求復市賞兼機責  
令擒獻緣本鎮督撫等官計議即各員役並與有勞隆慶時俺  
答擒趙全直中國叛賊耳猶敘賞有如此而不敘胡以鼓邊臣  
任事之心既而總督宣大尚書蕭大亨以分別敘賚請 上曰  
虜王擒獻史首皆緣督撫諸臣善盡忠勞可嘉允宜特敘其餘  
文武員役效有勤勞兵部并查具奏○甲戌夜月食○革萬安  
守備張國威任以江西巡撫論劾也○乙亥吏科給事中李汝  
華奏已故巡撫右副都御史邵仲祿奉旨贈兵部右侍郎夫侍  
郎崇秩非有駿業鴻猷何可加贈今仲祿緣通政而僕御而府  
尹既無事可見操江不數月巡撫未履任又無功可書登葬已



足示榮贈官實爲非分所引巡撫熊稱右都御史海瑞尚書李  
輔魏時亮並屬不倫未任者贈官則久任當何如無功者贈官  
則有功者當何如署吏部事左侍郎羅萬化服其持論之正而  
稱仲祿平生庶孝歷任賢能人品政績有足嘉者上命贈官遵  
前旨行○河州擒獲虜首奸細按臣數實以聞巡撫葉夢熊奏  
政劉光國原任總兵沈思學馬孔英等各賞銀有差○湖廣撫  
按劾洞庭守備史建侯等革任○萬全都司掌印張崇德以病  
廢事調任宣府守備范尚忠楊禮李國忠以貪縱不職革尚忠  
仍下御史提問○丙子以雲南廣西府知府沈橋爲兩淮鹽運  
使四川龍安府知府阮尚賓爲長蘆鹽運使○丁丑以月食特  
刻分秋監官推算失真禮部再疏叅罰奪監正張應候曆官李  
欽等俸有差○先是陝西巡撫沈思孝言逆賊勾虜諸部嚮應

而陝兵調遣無餘欲募浙兵五十宣大騎兵五千乞發帑銀充  
餉并釋李材赴用兵部會戶部覆議募兵遠地募難立至無如  
就陝招募土兵三五千可濟防守祈請銀兩務救燃眉李材謀  
畧素稱宜從撫臣之請詔發太僕寺馬價十萬兩着思孝即于  
本地募兵練習防禦仍命戶部發銀五萬充餉其李材欺君罔  
上照前旨行○戊寅陞山西右叅政楊歸儒為雲南按察使○  
協守洮岷副總兵陸賢不堪衝邊改調以原任陝西總兵官劉  
承嗣充副總兵代之陞山東都司僉書倪思立為山西都司掌  
印官○己卯陞禮部員外郎李開藻為山西提學僉事南京兵  
部郎中張璧為廣西僉事整飭江左道○庚辰陞福建鹽運使  
鍾昌為浙江左叅政○司經局洗馬魚修撰楊起元回籍養病  
○總督劉遵憲揭報倭犯朝鮮遵左戒備乞將保定總兵倪

尚忠移駐天津總管二鎮兵馬從之。○南京河南道御史陳邦  
科題黃淮水患隄不可恃水不可障欲除淮害須開瓦埠河以  
殺上流欲除黃害須多開遙隄縷隄諸埠口以殺下流欲禦高  
實諸湖患須繞濟灣頭廟灣等處三工以歸之江海成大工者  
不惜費乞發帑銀濟用庶平成之績可奏工部言御史原官湖  
邑近復經行廉訪必真如挑濟修復先後科臣原有條議其開  
瓦埠河曾經覆勘中止而遙縷二隄多開開口則諸臣所未及  
者乞行勘河科臣會同河漕部院確勘并覈工費以聞報可。○  
辛巳再發庫貯濟漚銀五萬兩給巡撫沈思孝備募兵月糧之  
用。○劉鎮三屯勇壯千餘以月糧未結又驗馬料過嚴擁遵化  
城鼓譟按臣劉士忠以聞兵部謂諸軍擁譟雖泉突之謀未成  
而干犯之跡已露即誅夷不為過但每歲春秋兩防宜按月支

行糧照例給馬料諸軍不得已之情有可原者今後依期給散  
姑與更新令其戴不殺之恩奮血戰之勇再有干紀勿事姑息  
可也 上曰防守行糧准照日給毋過期馬料并如議○戶部  
題金花銀專供 上用者直因循不解致借庫貯濟邊銀兩今  
西陲多警豈容復借宜行應天江浙廣湖福建撫按嚴督所屬  
如數解進有旨切責各撫按官着督有司追徵完解違者參來  
究治仍着該科不時參處○黔國公沐昌祚以驕恣革蟒玉半  
戴具疏乞復科臣吳鴻功等參奏昌祚未聞省改輒敢乞恩如  
果恪職宜聽該省撫按覈實以聞兵部言近據撫臣吳定敘功  
疏亦稱昌祚能自新獨御史勘報未至 上曰昌祚既經撫臣  
疏稱省改姑念鎮守遠方准與服色以便行事如仍不悛撫按  
參來重究○以陝西都司僉書王夢書充軍改掌印官○以虜

王擒獻史車二會敘文武諸臣功加總督尚書蕭大亨太子少  
保陞大同巡撫邢玠右副都御史馬林副總兵王志賢叅將師  
國勛都司安天爵守備吳宣府巡撫王世揚守巡道韓永善王  
象乾舊經畧尚書鄭維兵部尚書石星侍郎王基陳有年楊于  
庭各賞銀幣有差○癸未南京刑部尚書王用汲再以病極乞  
休吏部覆請許之○甲申陞浙江副使李同芳為湖廣右叅政  
整飭岳州兵備道廣西叅議李國士為雲南副使分巡臨沅道  
○浙江巡撫常啓敬言浙兵素稱驍勇去歲倭警特汰老弱募  
精壯申嚴節制一時將卒人人有城賊心如寧紹叅將楊文等  
聽用叅將葉懽等俱身經血戰勇冠一特願于所練各兵選一  
千名今統赴寧鎮為督臣銜鋒犄角之用糧餉器械俱臣措給  
上以助兵討逆特嘉其忠着該將官統赴殺賊○乙酉 穆宗

莊皇帝忌辰遣彰武伯揚世階祭 昭陵○改兵部主事孫璋  
為尚寶司司丞○兵部言延綏巡撫賈仁元奏稱達賊聚衆犯  
榆林官軍奮勇斬級二十七顆奪獲器畜稱是總兵董一元坐  
營石尚文制勝有功併該鎮昨冬擒斬安明等首級四百八十  
二名顆俱宜勲叙 上曰虜賊內犯官兵奮力敵殺忠勇可嘉  
應叙應賞員役撫按官并前擒斬安明功次速行勲奏以示激  
勸○署寧夏總兵事副總兵李物以威望素輕機會屢失革任  
回衛○丙戌陞刑部郎中楊時馨為山東按察司僉事備兵寧  
前道恩雨知府陸從平為兩浙鹽運使廷平知府周保為福建  
鹽運使○丁亥陞陝西副使房守士為山西右叅政備兵易州  
道山東副使彭國光四川副使陳文煥俱為浙江右叅政陝西  
副使寧化龍為山西右叅政○以泗州水災免原議協濟徐邳

河夫銀四百五十兩從戶部覆勘河科臣請也○勘河給事中  
張貞觀奏 祖陵為國家根本即運道民生莫與較重然歲漕  
四百萬頓一錢以給京師鳳泗淮揚又湯沐襟喉重地則運道  
民生所關亦非細也臣展謁 祖陵見淮水一望無際泗城如  
水上浮盃而盃中之水復滿氣象愁慘不忍觀聞雖 祖俊玄  
宮高聳乃自神路至三橋并諸儀衛丹墀無一不被水矣且高  
堰一堤危如累卵倘潰則裏河之民生運道立盡此又高寶意  
外隱禍也今欲洩淮當以開海口積沙為第一義然洩淮不若  
殺黃而殺黃于淮流之既合不若殺于未合但殺于既合者與  
運無妨殺于未合者與運稍礙別標本究利害必當殺于未合  
之先至于廣入海之途則自鮑家口王家營至魚溝金城一帶  
地勢頽下因而利導之似當并議者工部覆稱科臣親歷地方

擬議詳確皆前諸臣所未及者惟是黃河殺于未合運道仍宜計處若挑濬淮口停沙及利導鮑家口一帶當即如議措費興工以紓 聖明南顧未盡事宜通候酌請其移州治開周家橋瓦埠河既稱不便即應停止從之○酉刻一星自中天而雨流青白色尾有光○戊子陞南京大理寺右寺丞唐沂為南京太常寺少卿四川按察司僉事張世則為陝西行太僕寺少卿○命福建道御史饒位提調南直學政○寧夏巡撫朱正色題逆賊狡險勾虜攻戰俱難而糧餉缺乏城堡空虛虜三路為賊應援勢殊岌岌乞發餉數十萬仍間部院大臣專督邊儲民運戶部覆議太倉庫貯原備九邊年例查得四川河南省庫尚有餘積而距陝非遙宜于四川動十萬河南動八萬轉解備用陝西民運積逋撫臣須嚴督催無分秦越三邊督臣勅書請加兼理



糧餉四字庶使節制不必增設大臣滋擾督糧叅政顧其志宜  
給專劄作速買運曷糧赴鎮務濟時難 上命速如議行○禮  
部等衙門侍郎韓世能等同原叅官工部主事周如綸御史綦  
才于午門覆試被叅侍中舉人王兆河等六名公同彌封詳品  
文理平通四卷文理亦通二卷進呈裁定 上命將卷傳與九  
卿翰林科道各掌印官詳閱奏聞內被叅舉人屠大壯奏聞母  
喪乞回守制禮部覆請同衆覆試大壯徑行臨期不到 上謂  
大壯違旨規避革退為民仍行巡按御史查勘丁憂有無具奏